



**H**ieronymus apud Sueuos Oetingæ natus & educatus est . Hic cum foelici ingenio esset præditus , à pueris magna diligentia operam literis dedit , & prima artium rudimenta in patria percepit . Postea sese hinc inde ad uarias Academias contulit , atq; philosophiæ & artium studio incumbere cœpit . Id autem ut commodius efficeret , Græcam linguam exactè didicit , & rerum scientiam potius ex fontibus quã lacunis percipere uoluit . Itaq; factum ut artium magister creatus , magnum sibi nomen ob præclaram eruditionem compararit . Inde Basileam uenit , atq; aliquandiu bonis authoribus uacandis optima quæq; transtulit . Nam

ex Græco in Latinum uertit Isocratis orationes omnes , numero uiginti unum , cum nouem eiusdem epistolis , additis annotationibus ac difficilioru uocabulorum interpretationibus , quæ quidem Basileæ anno 1549 sunt ædita . Transtulit etiam Demosthenis oratorum Græcię principis opera , quæ ad nostram usq; ætatem uenerunt omnia , atq; in eadem iusta commentaria scribere instituit . Id cum D. Fuggeri literarum Mœcenates intellexerunt , eum Augustam Vindelicorum ad se uocarunt , & liberali stipendio ornarunt , ut ipsis iustam bibliothecam compararet , & eidem præset . In eo loco Hieronymus sua pietate & solida doctrina omnibus innotuit , & res sibi commissas fideliter disposuit . Deinde etiam Augustanæ scholæ præficitur , ut iuuentutem erudiat , & optimos quosque authores exponat . In ea functione is etiamnum pergit , & magna laude Augustæ adolescentiam , omni genere uirtutum & literarum , instruit , Con. Lycolth. Anon.